

INUIT ATAQATIGIIT

Inatsisartuni



07.03.2019

UPA2019/44

Allanguut

Siunnersuut 23. august 2018-meersoq taarserpaa

(Allanngortinneqarpoq taasissutissartaani piffisaliissutigineqartoq (UPA2019) taarserneqarpoq (UPA2020))

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

INI A/S-ip, Illuut A/S-ip kiisalu Namminersorlutik Oqartussat illuutaannik aallaqqaataasumik akiliutigineqartartut kattunneqarnissaat pillugu Naalakkersuisut UPA2020-mut pilersaaruisoqqullugit peqquneqarnissaannik Inatsisartut aalajangiiffissaattut siunnersuut.

(Inatsisartunut ilaasortaq Aqqaluaq B. Egede, Inuit Ataqatigiit)

Tunngavilersuut:

Ukiut qulikkaar marluk ingerlanerini nunatsinni pisortat inissiaataanni illuutaannilu aserfallatsaaliigasuarsinnaanermut aningaasaliissutit annertuumik annikillisarneqarnikuupput. Periuseq aningaasarpassuarnik sipaarfiusimasutut oqaatigineqartartoq aningaasartuutissarpassuarnik kinguartiterisimanertut oqaatigerusunnarneruvoq. Tassami illuuseqartoqarsinnaangilaq aserfallatsaaliineqanngisaannartumik, imaluunniit aserfallatsaaliinermut aningaasartuuteqanngiivilluni illuuteqartoqarsinnaangilaq.

Nunatsinni ilaqutariippassuit akuersaarneqarsinnaanngitsumik pitsaanngeqisunillu ineqartippagut. Pisortat atorfilittat imaluunniit ingerlatseqatigiiffiit pisuuteqattaaginnarlugit ajornartorsiut aaqqinneqarnaviangilaq. Iliuseqartussammi tassaapput uagut politikkerit. Iliuseqanngikkuttami inuppassuit ilaqutariippassuillu angerlarsimaffii ajorsigaluttuinnassasut uppernarsaatissaqartilereerpagut.

Allanngortoqartariaqarpoq. Naalakkersuisutigoortumik ineqarnikkut aaqqissusseqqinnissamik suliniuteqartoqartoq tamanit ilisimaneqarpoq. Matumanili pineqartoq tassaangilaq Naalakkersuisut sunik suliaqarnerannut sunillu nassuiaatissaqarnerannut akissutissarsiorneq. Naamik,- pineqartoq

tassaavoq inuiaqatigiinni inuit taamak ikitsigisut tunuliaqutaralugit inissiaateqarnikkut kiffartuussinermik suliaasaqarfiit taamak amerlatiginerat, ineqartunullu atugassarititaasut taamak ajorsigaluttuinnartiginerat allanngortinneqartariaqartoq pineqarpoq.

Ingerlatseqatigiiffiit A/S-itut ingerlanneqartut iluanaarniarnissamik tunaartaqarlutik ingerlasussaanerat immiini atuisut ineqarnerminnut qaffasissumik akiliuteqarnissaannik malitseqartitsisoq ajunngikkaluarpoq. Ajorluinnartunngortarporli inuit nunatsinni ineqarfigisaasa aserfallalluinnarsimasut nutarterneqarnerat malinnaaffigineqarsinnaanngitsutut isikkunikkiartormat. Ilaqutariippassuillu tusartualerpagut oquk aserfallassimanerillu saaffiginnissutigiuaraluarlugit nutarterisoqartannginnera.

Inuppasuit peqqinnanngitsumik ineqartitaalersimanagerat allanik pisuutitsinata, uagut qinikkat akisussaaffik tigusariaqarippat isumaqarpunga.

Illuut A/S aamma INI A/S immikkut pisortaqaqartut, tamarmik immikkut sulisoqaqartut, tamarmik immikkut allaffissornermik ingerlataqaqartut ataatsimik assigiiffeqarmata; tassalu, tamarmik ineqartitsinissaminnik soqutigisaqartuummata. Ingerlassagunillu atuisut akiliutaannik pisariaqartitsisuummata.

Atuisummi akiliisarput. Pisussaaffitsik naammassillugu akiliisussaataapput. Killormulli saatikkutsigu, ininik attartortitsisut piumagunik aserfallatsaaliinngikkallarsinnaapput qanorluunniit ineqartut peqqissusaannut sunniuteqaraluarpata. Inissiat ajorluinnaqqissaartut akit qaffasissut iniqartumut atuutsissinnaavaat. Tunngavilersuutigaaillu aserfallatsaaliineqassappata akit qaffasinnerisa aserfallatsaaliinissaq qaninnerulersissammassuk. Ukiut qassit taamatut sulii ingerlaqqissagatta?

Naamik, isumaqarpunga allannguisariaqartugut. Inatsisartunut ilaasortat akisussaassuseqarluta Naalakkersuinikkut pisussaaffiliiniarta ullumikkutut ingerlaannartoqarsinnaanngilaq. Nalunngereerparput pissutsit allanngortilluinnarneqartariaqartut.

Inissiaatileqatigiiffik kattussaq nutaaq nukinnik ataatsimoorussissaaq, ataatsimoorussamillu sulissuteqartussaassalluni: Nunatsinni init pitsaanagerusut. Tamanna nutaanik sanaartornikkut, aserfallatsaaliinikkut pissaq, ineqarnerlu tamakkiisumik nukittorsassallugu.

Taamaammatt siunnersuut una saqqummiussara neriutigeqaara Inatsisartunit akuersaarneqarluni Inatsisartut sanaartornermut ataatsimiititaliaani suliarineqartussanngorlugu ingerlatinneqassasoq.

Pisortanut aningaasatigut allaffissorinnikkullu kingunerisassai:

Naatsorsuutigineqassaaq inatsimut atuuttumut allanngortitsisoqartariaqarnissaa, taanna piffissartornarsinnaavoq ukiullu ilivitsup ingerlaneramik suliarineramik atuutilersinnissaanullu siviussuseqarsinnaanera naatsorsuutigineqassalluni. Aningaasartuutit AC Fuldmægtigep ukiumut sulineranut 500.000 kr.-mik naleqassaaq.

Namminersortunut aningaasaatigut allaffissorinnikkullu kingunerisassai:

Naatsorsuutigineqassaaq suliffeqarfik nutaaq aningaasaqarnikkut nukittunerullunilu allatigullu tamatigut sinerissami pisariaqatitsiffiusuni aserfallatsaaliinissanut inissianillu nutaanik pisinnaasaqarnerussasoq.

Innuttaasunut aningaasatigut allaffissornikkullu kingunerisassai:

Soqanngilaq